


## I FANGHI

**A**CCADI ancu chì quandu omu s'arizza, l'ochja li fermani quasi chjusi da a ciumaca chì li poni annantu una scorza soda. Subitu cù una stampa d'acqua melina, i si sdrifina par pulilli. Un' aspetta micca ad ochja ciumacosi dicendu chì ùn ci hè l'arti di fà nudda. Un' staria tantu à turrà cecu à bedda vera par sempiternu. Inveci si dà di mani è s'aiuta da par eddu senza aspittà à Tissu è à Cattissu.

Di i fanghi rossi o di colori altri, da parechju tempu, tutt'ognunu n'hà intesu discorra è à rombu, ni sà qualcosa. Si parla di i fanghi rossi è si trapparla ancu. Sarani vilanosi? A si sani i pesci chì sò morti! Ma comu hè quissa? Erani d'ità maiò, è si ni sò morti da par eddi di vera vichjara! Ancu assai! Chì i mara è i fiuma s'imbruttessini, i governa è quiddi chì pussadini i mezi di pruducia, n'ani cura pocu è micca; basta chì nudda li dessi da fà bè bè sottu à u nasu. Ma tal governu, chì anch'eddu metti altrò à vituperiu, ùn pò avè a faccia d'andà in liticheghji cù un antru governu. Nanzi ognunu ùn spazzessi u so zogliu, è fessi pulizia di u so locu, cusì tuttu quantu staria in sidili.

I morti anch'eddi, chì a si cridiani di godasi in santa paci un sonnu eternu — cacciatu quandu i puliticanti, prufissori di virtù macagnata, i facini vutà — ani intesu u rimuscio chì a causa l'hà st'affaronu di i fanghi. Ed hè vera chì si tratta d'un vituperiu di poca quentezza è di purcaria di spaventu. Hè u



Rinatu COTI

scarmasciu d'una sucietà di progressu, ma à l'arritrosa. E' cusì in u mondu fattu è rettu da i potenti, da i ricchi mezzi, u poveru ùn pudarà mancu più goda u so pocu di stantu, ci vurrà ch'eddu campessi in calchi maniera, annasendu puzza è anti-mogno di u ghjettu frusteri.

Ma a cumpagnia di i fanghi hè longa assai è pessima monda. Ci sò quiddi chì l'ochja poni vistigà, è ci mettini à priculu murtali più volti cà quant'è no a pinsemu. E' po ci sò quiddi chì ùn si poni tuccà di mani nè annasà di meffi, è chì puri è purtroppu ci attumacani è ci attusicani. I chjamaremu i fanghi piatti in fondu di ciarbeddu, di spiriti, di menti o d'anima, sarà ad usu d'ognunu. Un'a criditi micca chì sò ancu fanghi, quissi pinsamenti brutti è malvasgi chì ci venini in drentu à no, chì ci parini nostri, quasi di nascita, ma chì d'infatti ci ve-

nini imposti da una propaganda accanita chì piglia sustinimentu in un tempu in u soldu è in u puteri, è chì faci di l'individui, essari ammaistratoghji?

Un' hè micca una fanga à disprizzà à chì hè sfarenti à vo, par via di peddi, di capeddi, di ghirbatura di nasu, di feddi, di pinsamentu, di cultura, o di qualvoglia fussi rapportu di sfarenza trasformatu in rapportu di supiorità è d'infiorità? Un' hè micca una fanga puzzinosa quidda chì inghjinnareghja u razzisimu, chì impara ziteddi è maiò à disprizzassi è à disprizzà u so populu, à vituparà a so terra, à nigà a so cultura, à pigliassi in risa d'essa Corsu, è à creda chì vulè fà da Corsu hè un misfattu? Sì chì hè vera è certa!

Ch'è no l'annumessimi zacaglia, fanga, cianga o pantanu, bisogna cacciallici da par no da u ciarbeddu, risciarendulu è rifigliulendulu, da sottu à a piscia di a cuscenza critica, movitu di vita è d'umanu, chì c'impara è c'impeda à viva da essari maiò è degni. Un populu si faci cù a so cultura; l'omu si faci cù a so dignità.

Ma i forzi traversi sò sempre in traccia: praputenza, gattivu sughjittisimu, inghjustizia, intullarenza, razzisimu, è quali a sà quantu dinò...

Veghja sempre l'omu degnu è ùn lascia mai d'alzassi cù u lumu virtadeli di a so cuscenza. A cuscenza umana. Quidda chì faci l'omu presenti ad eddu è à l'altri.

R. C.

## CHI' GHJUNGHJE TROPPIU TARDI, RODE L'OSSE



Ghjacumu THIERS

**V**ULEREBBE di:

Io sò natu ind'un paese spostu à a buriana di un ventu carcu à stracci longhi, fatti di neve zeppa zeppa, sott'à un cele fretu imbiancatu da nuli chì currianu lesti versu una ripa stinzata à rent'un mare color di piombu è pichjulatu di marchi bianchicci. A' le volte, à rombu di sforzi arrabbiati, u sole strapava u mantu annivulatu stesu

sopra i nostri capi è schjaria, in pett'à a casa paterna accuculita à cant'à i pini maestosi, una striscia longa tirata di cotru cristallinu. Tandu, noi altri zitelli, puntavamu l'uscio: ma si pudia solu scrignallu, per via di u calafone incatastatu davanti a casarella. Allora, tiravamu dui salti di fora, è po in furia in furia, contr'à u buffeghju scatenatu, vultavamu à siccacci i nostri